

## **Oda iti Pinakbet**

Saanka a makalibak.  
Sayamusommo  
ti agkaradap  
iti malem,  
wenno agmatuon,  
uray pay bigbigat  
agalingasaw  
dagiti naanus a tayab,  
irikiar  
dagiti agpagugo  
a karabukob  
ken managayat  
a tian.  
Sudi ti bugguong.  
Kalimog man  
ti manmano  
a bagnet,  
agkamata a tinapa,  
wenno ania ditan  
nga inasar wenno panagpaw,  
wenno solsolo lattan,  
sumged, dumes  
latta ti nakairuaman  
a nanam. Libnos  
ti tarong  
a digosen  
ti tubbog-pamguongan  
a nayadi ken agpaay  
laeng a mamagkebbet  
iti naindaklan  
a sabor. Agas ti iliw  
ken saraaw.  
Darepdep  
dagiti mail-ila  
a dila ken bituka  
dagiti masmasnaayan  
ken/wenno mabisbisinan  
a dapan  
iti man ganggannaet  
a residencia  
wenno nakaikalian  
ti kadtadua. Sagangasang  
ti nataltal a laya.  
Abbukayenna

ti derrep ti karabukob,  
allukoyenna  
ti sibo ti bumara  
a dara. Kamatis  
a mangipinas iti  
nadarisay nga alsem  
ken namikki a sam-it.  
Ilutenna ti napakil  
a piskel. Kudkudanna  
ti agtarindanum  
a nakem. Galis  
ti okra. Uyosenna  
ti nalamuyot  
a tig-ab.  
Lanaanna  
ti agkalkalio  
a rikna ken mukod.  
Kadenna a paria. Nainlangitan  
a pait, nailian  
a raman  
dagiti mannaluyot  
a mammait. Napait,  
napait a di met makasugkar.  
Ngem no apay  
met nga iti pait  
mananammo  
ti sam-it. Ken apgad.  
Ramen amin dagitoy  
tapno imasen  
ti biag. Uray pay  
no kas 'tay  
kunadan a kaskasla  
la takiag. Bawangam  
ketdi  
iti kalalainganna.  
'Tay bawang-ilocos  
a parabur ti anus  
ken gadget. Kasikkawil  
ti lasona wenno sibuyas.  
Ay, umalimpatok  
a banglo. Igupennaka  
a kas 'tay maapiang  
a boksit. Idusenna  
'ta bisin,  
isagpawna  
ti adu a namnama.

Awanen, awanen  
ti sapulem pay  
no taraknem  
'ta kinnan, 'ta sindam  
a pinakbet.  
Pinakebbet.  
Ambrosia.  
Benditado  
nga ostia.  
Taraon  
nga agpadpada  
ti didiosen man  
wenno bag-en.  
Mamagpada, mamagpapada.  
Diosen ti dila ken dawatdawat.  
Anito ti iliw ken panagraas.  
Amin-amin  
agtamed  
iti grasia,  
iti pannubbot,  
iti pannalakan  
ti pinakbet.